



Äntwert vum Här Minister fir Wirtschaft, PME, Energie an Tourismus, Lex Delles, op d'parlamentaresch Fro n°1629 vum 4. Dezember 2024 vum éierbaren Deputéierte Sven Clement

De Bannemaart vun der Europäescher Unioun (EU) ass e groussen Atout fir eis Wirtschaft. Déi grenziwwerschreidend Zirkulatioun vu Wueren a Servicer muss an all Memberstaat vun der EU assuréiert sinn. An dësem Kontext gesäit d'Direktiv (EU) 2015/1535 eng Notifikatiouns-Prozedur fir technesch Reegelen am Beräich vun de Produiten¹ a vun den elektronesche Servicer² vir. Dës Reegele mussen deemno am viraus un d'EU-Kommissioun matgedeelt ginn, mam Zil Bannemaartbarrièren fréizäiteg ze identifizéieren. De Wirtschaftsministère ass fir de Suivi vun dëser Préventiounsmeasure zoustänneg.

Entspriechend dem Gesetz vum 8. November 2016, dat d'Direktiv (EU) 2015/1535 an eis national Gesetzgebung transposéiert huet, ass den « Institut luxembourgeois de la normalisation, de l'accréditation, de la sécurité et qualité des produits et services » (ILNAS) zoustänneg fir d'Notifikatiounen vun technesch Virschrëften un d'EU Kommissioun ze assuréieren. Dëst gëtt an der Praxis iwver eng elektronesch "EU-base de données" gemaach, den « TRIS »-System (*Technical Regulation Information System*).

Fir de Fonctionnement vun dëser Prozedur ze garantéieren, mussen d'Auteure vun legislativen Texter am Viraus kontrolléieren, ob hir Texter technesch Virschrëften enthalten. D'"Fiche d'impact", déi vun den Auteure fir all Projet muss ausgefëllt ginn, weist dorop hin, datt technesch Reegele mussen un d'EU-Kommissioun notifiéiert ginn. Wann de Projet sou Reegele virgesäit, muss déi kompetent Administratioun deemno den ILNAS kontaktéieren fir d'Notifikatioun am « TRIS »-System ze maachen.

De Wirtschaftsministère mécht och zesumme mam ILNAS eng « Veille législative », déi doraus besteet sämtlech Projeten, déi op der Dagesuerdnung vum Regierungsrat stinn, am Viraus op technesch Reegele ze iwverpräiwen.

D'Notifikatioun ass de Startpunkt vun enger sougenannter « *standstill* » Period, déi dräi Méint dauert. Wärend dësen dräi Méint däerf déi technesch Reegel net adoptéiert ginn, well d'Projeten nach mussen kënnen ugepasst ginn. Bei all néideger Modifikatioun, wäerten d'Chamber an de Conseil d'État duerch de Commentaire vun den Artikelen informéiert ginn. D'EU-Kommissioun an déi 26 aner EU-Memberstaaten hu wärend dëser Zäit d'Geleeënheet Kommentarer esouwéi och « *avis circonstanciés* » ze maachen. All

¹ Den Artikel 1, Abschnitt 1, Punkt c), vun der Direktiv (EU) 2015/1535 seet Follgendes : « *spécification qui figure dans un document définissant les caractéristiques requises d'un produit, telles que les niveaux de qualité ou de propriété d'emploi, la sécurité, les dimensions, y compris les exigences applicables au produit en ce qui concerne la dénomination de vente, la terminologie, les symboles, les essais et les méthodes d'essai, l'emballage, le marquage et l'étiquetage, ainsi que les procédures d'évaluation de la conformité.* » Zum Beispill : e Verbuet vu Substanzen an Produkter, déi mat Liewensmëttelen an Kontakt sinn, ass eng technesch Virschrëft.

² Den Artikel 1, Abschnitt 1, Punkt e), vun der Direktiv (EU) 2015/1535 seet datt : « *une exigence de nature générale relative à l'accès aux activités de services [...] et à leur exercice, notamment les dispositions relatives au prestataire de services, aux services et au destinataire de services.* » Zum Beispill : d'Limitatioun vun Auerzäiten oder eng geografesch Limitatioun vun enger App fir den Transport vu Passagéier.



aner betreffen Parteien hunn och d'Méiglechkeet op der ëffentlecher Säit vun der « TRIS » Remarquen ze formuléieren.

Den ILNAS gëtt dëss Retouren un déi zoustänneg Verwaltungen weider. Op Basis vun der Direktiv mussen d'Auteurs op all « avis circonstancié » äntweren. Äntwerten op aner Zorten vun Kommentar sinn fakultativ. D'EU Kommissioun kommentéiert d'Äntwerten vun de Memberstaaten³. Dës Echangen ginn op der ëffentlecher Säit vun der Base de données « TRIS »⁴ publizéiert.

Fir de Rescht gesäit d'Direktiv zwar keng Sanctiounen vir am Fall wou e Memberstaat net op en « avis circonstancié » äntwert, mee den Europäesche Gerichtshaff huet an enger Rei Fäll schonn d'Inapplicabilitéit vun technesche Reegele prononcéiert⁵, bei deenen d'Prozedure vun der Direktiv net respektéiert goufen.

Lëtzebuerg, den 19. Dezember 2024

De Minister fir Wirtschaft, PME,
Energie an Tourismus

(s.) Lex Delles

³ Artikel 6, Abschnitt 2, vun der Direktiv (EU) 2015/1535.

⁴ <https://technical-regulation-information-system.ec.europa.eu/fr/home>.

⁵ CJCE, 30 avril 1996, *CIA Security International SA contre Signalson SA et Securitel SPRL*, aff. C-194/94, pt. 54-55, fir d'Absence vun Notifikatioun, a CJCE, 26 septembre 2000, *Unilever Italia SpA contre Central Food SpA*, aff. C-443/98, pt. 49-52, fir d'Adoptioun dun der technesch Virschrëft virun d'Enn vun der « standstill » Period.